

四庫全書

集部

欽定四庫全書

集部

明詩綜卷六十五

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷六十五

翰林院檢討朱彝尊編

李流芳

十一首

流芳字長蘅嘉定人萬厯丙午舉人有檀園集
山中喜張魯生至同尋熨斗柄坐湖邊竟日而還
偶作

貪游不知止足力疲屢試起晚日當午偃曝聊自恣忽

聞故人來發我湖上意出門何翩翩兩足殊快利嘗聞
熨斗柄頗怪此名異昔年過其下髣髴已忘記今日天
有風湖山想奇致相與歷西磧山窮見湖勢沿流正縈
紆撫石得小憩飛湍擊嶒岈穹壁立巋巋洗出如削成
斗絕畏崩墜閃爍絢丹堊剝落疑文字傾厓側足過陰
壑緣藤縋燕磯與鼃渚生平快游地遂擬兼勝槩恍忽
理夢寐高歌遏水聲浩蕩入胷次吾欲乘長風悠然向
天際惜哉多舟楫使我不得濟

過皋亭龍居灣宿永慶禪院同一濂澄心恒可上人步月

每多方外游見僧即如故燈明一龕下夜長愜深悟不知山月上千林已流素出門尋舊蹊愛踏松影路幽泉洗我心微鐘杳然度

戲示山中僧侶

山居不須華山居不須大所須在適意隨地得其槩高卑審燥濕涼燠視向背樓閣貴軒翥房廊宜映帶或與

風月通或與水木會卧令心神安坐令耳目快皋亭美
林壑中壙亦稱最一樓負山立圭竇如向晦山僧請余
住余性苦不耐勸令開八牕咄嗟變湫隘前楹布清陰
後戶攬蒼靄玲瓏稱人意蕭爽出塵界驟然謂山僧此
中固有解往往住山人不知山好在我昨居新菴結構
亦可怪居然仇涼風似欲杜靈籟古梅如老宿亭亭使
人愛其下安竈突柯條半焦壞悲哉冰玉姿坐受熏灼
害見之熱五内如身被桎械誰當共拯此移竈出樹外

面南闢小扉日與香雪對區區一緡費功德及萬倍吾
言不見用終為未了債

訪秦心卿溪上嬾園不遇有作

溪上好園亭君家聞最勝經過已廿年今始識三徑翳
然臨水間愛此飛閣映位置不在多貴與風物稱主人
意疎豁事事得真性我來不相值維舟柳邊暝見戴自
無須悠然發孤詠

贈別洞庭葛實甫

我懷洞庭月欲醉莫釐峰幽意久不愜高人今乍逢新
詩正堪把歸權阻相從却羨秋山下丹黃已萬重

黃河夜泊

明月黃河夜寒沙似戰場奔流聒地響平野到天荒吳
會日已遠燕臺路正長男兒久為客不辨是他鄉

訪慧法師於皋亭桐塢作

不見皋亭慧法師每勤書札慰相思蹉跎又作三年別
慙媿終無一往時忽憶虎溪成舊社且尋茅屋賦新詩

關門短櫂衝炎去黃鶴峰頭月上遲

元夕雨邀里中諸君小飲檀園燈下次伯氏韻

花邊樓閣月邊廊更愛繁燈照夜光雨氣無端先客到
檐聲應為和歌長城頭結綺人俱散邨裏迎神鼓不忙
且盡一杯酬令節泥深門外亦何妨

為陳維立題輞川畫

吾愛華子岡輞川流日夕如何舍此去傷心賦凝碧

雨中看梅西磧即事

邨園門巷逐花低
藤蔓桑條咫尺迷
花底泉聲認歸路
沿流直到石橋西

題畫似雪嶠師

千峰頂上只通雲
一水人家別有邨
直到前山蘭若路
清鐘落日不逢君

成靖之一首

靖之初名基
命字必于
大名人萬歷丁未進士
改庶吉士授編修
累官吏部侍郎進尚書
入東

閣加太子太保禮部尚書文淵閣大學士贈太保謚文穆有雲石堂集

送劉紫芝南還

遠別人情惜君歸更若何
匡時憐道直涉世患才多
路柳催春去江風拂櫂過
還應逢雨露且莫怨蹉跎

錢龍錫二首

龍錫字稚文號機山松江華亭人萬曆丁未進士授編修歷中允諭德以少詹掌南京翰林院

升禮部尚書東閣大學士召進文淵閣加太子
太保致仕歸尋逮繫詔獄論斬得釋戍定海衛
久之還里卒于家有觥餘存橐

靜志居詩話公始入閣思陵命定附魏璫諸逆
臣案出黃羅囊示之且曰忠賢一豎何能為皆
外庭力為諂諛至此囊中章疏悉媚奄人實蹟
也公乃取以論罪分別重輕凡六等又慮罪人
狡辯因請於諸臣姓名下各注所犯俾服其心
逆案既定黨人銜怨刺骨素崇煥經畧遼東入
見帝大言期以五年奏功公疑焉退而詣之曰
子方略將何如對曰不外東江關寧兩路進兵
爾東江者島帥毛文龍也公曰舍關寧實地而
問海道何與對曰譬如奕然局有四子東江其

一也可則用之不可則有以處之崇禎二年五月崇煥行邊至雙島召文龍至以餉金十萬犒其師自與文龍登舟相視山海形勢酒間勾隊岳帥麾下以邊警報者踵至崇煥乃疑曰吾軍亦有偵探卒何以不一至此逮吾行爾起數其跋扈拔尚方劍斬之聲其罪置帥而返全軍莫敢譁也及大安口失事都城被圍崇煥勤王師至廷臣多言崇煥之殺文龍陰為主款地思陵大疑尋有旨俾繼城入下之獄訊叛狀於是御史高捷劾公與袁同謀崇煥既誅御史史堃劾公逮繫詔獄論斬有司設廠於西市將用夏言故事既而緩決左中允黃道周給事中劉斯球先後為公訟冤得釋戍定海衛居戍所九年乃還崇煥之死詳載本朝實錄操史筆者不可不知

初入翰林述志

皇風被奕葉師濟協重熙妙選金閨彥登茲白玉墀
慚予蹇劣士何幸沐恩私就將彌日月摹範承師資
雕蟲既云拙溫飽匪所思獨此葵藿心耿耿誓不移
念昔皇祖日講藝恒孜孜天顏瞻咫尺密室奉疇咨
衮德信多補臣忠實在茲顧問久寂寞簪笏徒委蛇
四郊漸多故啓沃効者誰所願回宸照堂廉路不岐

題幽風七月圖

國本民生繫深思草昧存淳風懷瑾戶美俗寫朋尊卜
洛從何始承邵信有源艱難開聖主告誡切文孫拭目
丹青麗賡歌雅什溫思隨工瞽誦欣望闢虞門

楊連一首

連字文孺應山人萬厯丁未進士除常熟知縣
徵授戶科給事中歷禮科都給事中升太常少
卿擢右僉都御史進副都御史死璫禍贈太子
少保左都御史謚忠烈有集

詩話六君子被逮周朝瑞乘帆顧三公以五月
到北司魏楊左三公以六月到北司比較之日
六君子伏檐溜下楊居中左居楊之左魏居楊
之右顧居魏之右周居左之左袁居周之左許
顯純初猶作爾汝稱旋竟呼名叱咤獄吏有稱
犯官者顯純怒罵曰此等犯人爾何官之有其
刑具有械有鐐有梃有桡有夾棍遇比較流血
灑地楊左魏三公先斃次袁次周次顧投繯而
逝是年六月詔獄土地祠前樹下生一黃芝六
君子至日光彰映人環視適六辦見者疑吉兆
顧公歎曰芝瑞草也而生於獄其妖乎未幾六
君子皆斃於獄楊公之歸觀也負以二騾其子
及一二蒼頭徒跣道上
上行路皆為飲泣云

題柏子園青雲閣

官閣凌空汶水深金甍初動客登臨浮雲易改三山色
落葉先驚萬里心江上美人遺雜佩城南少婦拭清砧
繁臺兔苑今禾黍日暮憑闌思不禁

左光斗一首

光斗字共之桐城人萬厯丁未進士授中書舍
人擢浙江道御史升大理寺丞進少卿終左僉
都御史死璫禍贈太子少保右副都御史謚忠
毅有集

詩話萬忠貞之死忠毅哭之以詩有云我有白
簡繼君何能已與君同游杖下笑丹心留在天
壤間默默之生不如死是亦不媿其言者也詩
多晚唐風韻如濕雲留野樹晴雪照征衣凍犬
迎人返飢烏下食齊一觴邀老友隨意發新歌
過雨煤錢長將炎水價添野牆藤蓋瓦村落樹
為橋問節驚初度思親改歲華疲驢衝道
路破帽出都門宛然鄭都官姚少監遺格

憶龍眠山居

卜築傍龍眠雲深一徑穿源窮纔見屋山盡忽開田芋
栗新栽得芻蕘任往焉笑余緣底事一別動經年

顧大章一首

大章字伯欽常熟人萬厯丁未進士除泉州推
官改補常州府學教授稍遷國子博士轉刑部
主事歷禮部員外郎出為陝西按察副使被逮
卒于獄贈太僕寺卿謚裕愍

詩話楊忠烈攻魏忠賢人疑其草者繆文貞王
莊毅攻客氏人疑其草者顧裕愍此兩公所以
不免也裕愍與弟大韶仲恭詩
義妙絕時人詩特具體而已

被逮道經故人里門

檻車塵逐使車轅一路知交盡掩門猶喜多情今夜月

斜窺樹隙照離尊

李標一首

標字建霞高邑人萬歷丁未進士改庶吉士除
檢討累官太子太保禮部尚書文淵閣大學士
題梁慎可墨香亭

古樣蕉衫白接羅芳亭長日坐支頤焚香自悟無生訣
拈筆閒摹有道碑竹韻松濤清自遠花觚茗盃靜相宜
近來愛寫黃庭否好換新鵝浴小池

許令典一首

令典字稚則海寧人萬厯丁未進士官至淮安知府有靈泉羸史集

詩話稚則一官不達意薄淮陽散髮歸田陶潛之屋不豐范蠡之舟偏小藍輿竹杖紙帳繩牀雅饒樂趣所云愛官何似愛吾廬也詩取適意無意求工益本於香山擊壤

題陳平叔陋巷

狹巷難容旋馬小池也愛籠鵝客來兒子教揖興到老人自歌

馬德澧 一首

德澧字以容平湖人萬厯丁未進士改寧國府
學教授入為國子監博士遷刑部主事歷郎中
卒贈太常少卿

曹園讌集

名園成勝引畫榼出疎籬不厭杯頻勸何妨席屢移暮
煙停客權宿雨亞花枝興劇忘歸去娑拖月上時

鄒維璉 六首

維璉字匪石江西新昌人萬厯丁未進士除延
平推官徵授南京兵部主事歷員外郎中改吏
部坐削起南京通政司參議遷行太僕少卿以
僉都御史撫福建終兵部右侍郎有願學編宦
游友白導噫等集

述懷

羶塗難久居盛名寧久留所以鷗夷子五湖一扁舟應
無雄辨士俯狥燕客求四時忌成功急湍無安流美服

人所指權利倍添憂

古意

百年苦瞬息人事復乖違
園中桃與李安能久芳菲
天風埽枯葉北雁忽南歸
嗟我行役人年年戍金微
臆臬自西來游子未授衣
嚴霜墮關塞明月照孤幃
兩地共搖落兩情共欷歔

秋興

鴟梟得腐鼠輒以嚇鵠雛
鵠雛飲清露高飛棲碧梧
飄

然樊籠外野性常自如
鴟梟即飽食能無畏
張弧古云
鹿生山命已懸庖
厨達人訪物理深藏賦遂初

初至夜郎

遠戍天涯事可悲
疎狂真負聖明時
誰言鴻鵠能千里
差喜鷓鴣託一枝
草野數懸丹闕夢
鄉園空望白雲垂
高山流水情堪詠
已擬埋名老下帷

閨怨

妾恨憑誰寄
君懷祇自知
堂前雙燕子
歲歲赴春期

陌上偶成

青青道傍柳轉眼忽成圍
男兒客他鄉不知歲月非

徐從治一首

從治字肩虞海鹽人萬厯丁未進士除桐城知縣
改府學教授轉國子助教遷南禮部主事歷郎中
出知濟南府以山東按察副使分巡兗東以布政司
右參政分巡濟南加右布政使請告歸起薊州兵備
道尋加左布政使復移病歸再

起山東武德兵備道超拜都察院右副都御史
巡撫山東萊州被圍中飛礮死事聞贈資善大
夫兵部尚書賜祠曰忠烈有集

詩話徐公平白蓮賊擒其魁徐鴻儒脅從四萬
六千餘人悉赦罔治其奉命鎮撫山東詔駐青
州而公以叛軍將掠萊州特與防撫謝璉治守
城具三宿而兵大至固守七月為礮石碎顧殞
於城上合乎以死勤事之祀典矣公孫曰全曰
令均有文米以公遺詩三篇見示因錄其一反
覆誦之不異張中丞接戰春來苦孤城日
漸危裏瘡猶出陣飲血更登陴之句也

入萊州城被圍作

崇禎五年春帝命師中錫俾撫大小東星言事羈勒於
時二月朔告警馳羽檄叛軍無安巢掠地恣所歷萊牧
實要衝羣兇首矍踣雖有防守臣敝甲同袒裼詔許駐
青州欲往寸心慙萊民亦吾民不忍付焦溺單車指危
邦夫豈尚沾激須臾寇果臨疾風走沙礫孤城露南隅
三面受鋒鏑雲梯匪一層地道發重甍捷如猱升木多
於螳緣壁穴以擴熏尸臺縱火燔荻相隨八十騎騎騎
奮長矜自顧一書生乃當萬人敵援兵絕虵蟥礮石轟

霹靂誰與生厲階失計遂貽感一星
燄不撲燎原衆斯惕兩葉生不除須用斧
柯析奈何肉食謀議撫不議擊養癰久必潰
累卵危終殞哀哉此邦人何讎委虺蜴效
死職所甘智已窮墨翟

沈聖岐二首

聖岐字千秋烏程人萬厯丁未進士除工部主
事歷員外郎中出知濟南府

送閔昭余出守漳南

閩南虎竹三千里
苔水漁村二十年
別後相思夢何處
刺桐花發海雲邊

卽事送吳翁晉

百尺飛絲送柳花
青春欲暮未還家
揚鞭忽到鳴箏處
一笑初停白鼻騮

錢文薦

二首

文薦字仲舉
慈谿人
萬厯丁未進士
知新野宜

春二縣入為工部主事
有麗矚樓集

詩話仲舉論詩升少陵於堂置之首座青蓮次之高岑王孟又次之餘子隅生侍酒而已自謂吾輩於此不可不占一生否亦須坐兩廡中聆鐘磬管絃之盛然觀其製作未免懦鈍譬之於樂僅比於祝歆桎梏焉爾至駁顧茂齊謂少陵詩窮後工以為非是詩至少陵窮固工不窮亦工也斯言得之

月下懷馮正子太史

夜坐林木清見此池上月羣峯忽已淨孤雲澹將沒
愁深白鷺渚夢斷蒼龍闕望望曙河遙思君不可越

山居雜興

自埽閒房卧能令俗慮輕披簾邀乳燕挈榼赴遷鶯海
味梅魚滑山毛竹筍清湖天思盪槩恰喜報新晴

趙 岫一首

岫字子函一字屏國蓋屋人萬厯己酉舉人

詩話子函好古拱石墨鐫華闕中金石
藉其題識詩不見醜尚存康王遺格

茂陵

黃山歷盡見孤城城上樓高眼倍明芳樹寢園今北望
暮雲宮闕舊西京芙蓉晝冷仙翁露苜蓿春閒宛馬聲

回首長楊誇獵地何人得似子雲名

韓敬一首

敬字求仲歸安人萬厯庚戌賜進士第一授修
撰尋謫行人司副

題南陔山房

碧山初築澗之濱
選石疏池位置新
坐守庚申偕道士
橋名丁卯續詞人
深情只託支頤笏
時樣爭傳墊角巾
縱是漁師魚不賣
暇從秋浦戲垂綸

張慎言一首

慎言字金銘陽城人萬厯庚戌進士官至吏部

尚書有泊水齋集

過洹水將入里有懷長安古人

洹水纔過丹水流客愁爭似水悠悠汀洲綠映征袍淺
桃李香迎語鳥柔耽靜計將書卒歲懷人豈但目三秋
歸來鄉里都如故晚計方思馬少游

王志堅一首

志堅字叔士崑山人萬歷庚戌進士官郎中

寄長蘅

吾觀仕宦人每每念丘壑雖復非真實茲意或間作譬
如酒食困番思若飲樂病苟稍稍去旋復恣饒嚼嗟余
困折久本自甘濩落茲將非得已黽勉就人爵人生能
幾何胡為久熏灼寧為沙上鷗毋取籠中鶴

尹嘉賓 二首

嘉賓字孔昭江陰人萬歷庚戌進士授中書舍

人升兵部員外出為湖廣提學副使有焚餘集

舟泊惠山夜坐思琴

昔年與之子把酒對瑤琴明月蒹葭浦秋江楓樹林
擣衣中夜緩落葉萬山深悵矣誰能理烟波不可尋

江上雜詠

河豚雪後春還淺刀鱗風來水已波攜酒江邊吹笛坐
看山何處出雲多

莊起元一首

起元字中孺武進人萬厯庚戌進士除浦江知
縣調蘭谿遷南戶部主事歷員外郎中出知撫
州府官至太僕少卿有漆園卮言

紫霞洞

石室何寥廓蜿蜒信地靈洩雲終古白豔草自然青軒
帝藏神鼎淮王貯道經翛然來物外思鍊羽人形

鄭之文一首

之文字應尼南城人萬厯庚戌進士授南京工

部主事歷郎中遷知真定府有遠山堂錦硯齋

集

金陵元夕

花下燈前出畫裙
衣香一路暗氤氲
不知南陌人如月
但道東門女似雲

王象春

十首

象春字季木濟南新城人萬厯庚戌進士除上
林苑典簿遷南京大理評事歷工部員外改兵

部終吏部郎中有問山亭集

詩話萬歷中年詩派雜出李木自闢門庭不循
時習雖引關中文天瑞為同調然天瑞太支離
未免邪徑害田矣未若李木之無戾葦雅也題
項王廟壁一篇比於謝參軍鴻門作更覺道鍊
亡友潁川劉考功公馭亟賞之幾於
唾壺擊缺此非邪師外道之傳也

山老鴉

山老鴉朝東暮還西過河拾杜梨日晚腹飽不歸去
繒繳已伏河邊樹爾腹已飽爾不知飽人之腹良足悲

打棗竿

打棗竿光瑩瑩

廣韻永兵切

岸上小兒赤身擎去而復來無

時停終日剝啄不盈升低枝已盡高枝熟我竿恨無三

尺六

空城雀

空城雀飛且止不營棲巢不哺子相呼莫向網羅死

書項王廟壁

三章既沛秦川雨入關又縱阿房炬漢王真龍項王虎
玉玦三提王不語鼎上杯羹棄翁媿項王真龍漢王鼠

垓下美人泣楚歌
定陶美人泣楚舞
真龍亦鼠虎亦鼠
送友人

郭外溪邊寺年來兩送行
攀條猶在眼落葉已無聲
憶昔春山色能輕故國情
好將詩酒約歸問魯諸生

謁岳武穆廟

哀草寒烟日暮時
傷心瞻拜岳王祠
君王自得偷安計
臣子應班痛哭師
東海未填精衛死
南風不競杜鵑知
由來和議非長策
千古英雄恨莫追

硤石懷古

即嶠陵

真成箭括與車箱猶是千年古戰場想像國殤思蹇叔
時因風雨憶文王楚人一炬曾經入薊馬長驅亦未防
三復青蓮蜀道曲休令所守化豺狼

石城月

金陵王氣未曾消水泊秦淮江上潮月到石頭城下好
碧雲紅樹聽吹簫

山家

山家香粿飽椿芽
雨歇籬傍自種花
割麥績麻旋剝棗
一年三度坐牛車

不落夾

慈寧宮裏佛龕崇
瑤水珠燈照碧空
四月虔供不落夾
內官催辦小油紅

馬之駿 三首

之駿字仲良新野人
萬厯庚戌進士除戶部主
事歷員外郎中降廣德州同知升應天府通判

調順天尋復官戶部主事終員外有妙遠堂集

詩話仲良才頗縱

橫微嫌圭泰未合

十方禪院

何處堪消夏非山即水鄉樹深渾欲暝花近反無香欲
晚波難綠迎秋木漸蒼市譁原未遠烟景乃微茫

秋日草橋作

白屋邛邛度青帘面面迎野溪殘雨入側樹早陰生
梨棗過橋色雞豚近市聲未論丘與壑出郭已多情

送劉四

別酒呼還輟歎歎百感俱兩年何事隔明日此身孤秋
水殘城郭清霜點驛塗故鄉歸總好高會復能無

陳翼飛

十五首

翼飛字元朋平和人萬厯庚戌進士除宜興知
縣被劾歸有慧閣長梧二集己未庚申辛酉壬
戌行卷

詩話元朋牽絲百里遽挂彈文坎凜終身賴詩
篇以陶冶集甚繁富幾與明卿伯玉爭多史取

一編惜乎未就觀其解組記自述與韓求仲偕
將金山有詩僧慧秀攜沈孝廉虎臣札來謁韓
中稱引宜興吳徹如觸韓怒嫚罵吳不絕口以
慧秀詩挂松枝上斥而遣之慧秀訴之於吳時
沁水孫尚書居相以御史督運漕漕吳啖孫劾之
代為草奏解連鄒臣虎湯嘉賓黨禍既成元朋
一跌遂不復振矣近見後學與求仲臣虎元朋
皆同籍而所選詩槩削去不錄嗚呼桑海既遷
猿鶴沙蟲悉化而雌黃藝苑者黨
論猶不釋於懷可為長太息也

齋居

白水浮官舍青山塞縣門案頭塵未積塵尾禿猶存
莽雲中樹瀟瀟雪後邛齋居春事少農務與誰論

溫陵道中

九日山前路登臨病未能
煙蘿從晶晶雲樹幾層層
豹犬柴門月人魚海市燈
不堪聞杜宇匹馬過溫陵

帳望

寂寂何多緒憑高魂易銷
疎鐘蕭寺雨遠樹海門潮
秋月七千里春風廿五橋
愁來頻徙倚躡破小山寮

大湘灘

遮莫上瞿塘濫潏大如象
不見建溪石連亘三千丈

甘露寺

山色乍有無江光遞明滅夕陽大道傍行人讀殘碣

清湖舟中

枯柳霜中鵲長烟雨後山人來吹笛罷獨立碧溪灣

落星石

白榆何夕墮危石青如此疑是酒星沉渴飲湖中水

馬當

廟鼓持芭舞蠻歌日易斜分風能送客不忍打神鴉

檀公壘

故壘青仍在符鳩白不飛
長城他日壞衰草夕陽歸

橫江館

橫江館外雲津吏莫東指
但為放舟行風波日如此

赤欄湖

朝泛赤欄湖暮宿黃金浦
多少采菱船來問襄陽估

武昌西門

郎採白蘋花儂開青箬酒
夜宿武昌城朝折西門柳

上元夜別

金鴈歌斜記昔年輕籠慢撚最堪憐四條絃索無端絕
一夕春風也颯然

荔支詞

梧州四月火山紅南海丹時黃雀風不及閩中焦核好
定應饒殺葛仙翁

無題

二月長安醉是鄉青樓繫馬拗垂楊可憐韋曲花如錦

惱殺相思賀二孃

賀萬祚一首

萬祚字孝延嘉興人萬厯庚戌進士授刑部主事調南禮部轉郎中再調兵部出為山東提學副使歷福建參政廣西按察使以江西右布政使分守嶺北道有大業齋集

陳孟常云孝延詩寫情性質有其文

周侍御行部

蘭臺使者舊知名攬轡從容江海情抗疏共看任伯雨

行軍還擬趙營平五花驄馬巡周道三輔黃圖歷漢京
不獨艱危憂水旱前籌更欲請長纓

朱大啓

四首

先伯祖字君輿別字廣原萬厯己酉以秀水籍
順天鄉試中式庚戌賜同進士出身除南昌推
官擢吏部主事歷員外郎中崇禎初升太常少
卿轉太僕卿再轉大理卿遷刑部左侍郎贈尚
書有曼寄軒集

詩話東漢風俗之厚期功之喪咸得棄官持服如賈逵以祖父喪戴封以伯父西鄂長楊弼以伯母繁陽令楊君以叔父上虞長度尚以從父渤海王郎中劉衡以兄思善侯相楊著以從兄太常丞譙玄槐里令曹全以弟廣平令仲定以姊王純以妹馬融以兄子皆以憂棄官輕舉至晉而嵇紹拜徐州刺史以長子喪去職陶潛以程氏妹喪自免作歸去來辭自是而後古之道莫之行也先伯祖掌銓東曹聞先文恪公之訃請於朝乞歸持服德陵允焉當時典禮者亦不以為過斯國史所當附書於禮志者此事尚未百年今則父母之喪有不去其官者矣先文恪以宰輔歸所遺僅墓田七十畝先伯祖五倍之恒曰吾官階三品而恒產倍蓰於保傳死何以見叔父地下鄉黨傳其言數清門者必先吾朱氏焉先伯祖晚愛結方外社與秋潭萍蹤雪嶠

諸法侶游更唱迭和故曼
寄軒集禪誦之言居多

良鄉除夕

時改歲元旦崇禎
紀元是日立春

古驛逢今夕他鄉對故人
椒盤囊底舊霜鬢客中新
守歲剛辭臘乾元早布春
聖恩方浩蕩何必歎風塵

經海印廢寺

我行海子橋不見鏡光閣
惟有青蓮花涼風吹又落

自信州還貴溪

小艇恰容膝輕帆下溜灘
忽聞津吏語斜月挂江干

黃巖道中

萬樹梨花白滿山
桃花幾點破紅顏
春風盡日黃巖裏
數遍峰頭不肯還

郭忠宁一首

忠宁字蓋卿吳縣人萬歷庚戌進士除刑部主
事歷郎中改工部出知河南府調台州道湖廣
按察副使終陝西右參政有也園詩藁

渡江

飄然一櫂沂空明日午春潮尚未生回首江南增客戀
新晴鐘鼓潤州城

崔世召

二首

世召字徵仲寧德人萬厯己酉舉人知連州有

秋谷集

詩話崔君令巴山有為魏瑞祠請頌德詩者峻
拒之遂被逮入都下獄崇禎初釋還補官桂東
尋司浙中賑務詩
頗清徹無塵坌氣

昔昔鹽

妙舞低垂手聽歌昔昔鹽閨人雙淚迸遊子五湖淹水
餞春漸去堦延月影潛嬌鶯藏樹澀弱柳覆堤纖西舍
徵簫板東鄰豔鏡奩燈孤煤漸別被冷夢難慊雁過衡
陽斷雞催鼓角嚴碧桃花又落蒼蘚逕仍添帶減驚找
玦釵塵罷卷簾從來音信杳怕問卜書占昔昔曾相約
頻將舊語拈

重九章江門守風有賦

時將
被逮

黑雲照空秋氣昏章江城外逆水渾封姨鼓浪掀江豚

招招舟子亦銷魂
酒罷問天天不言
野雞午叫黃花村
誰家買醉登高原
我已挂冠君落帽
擢髮數罪難具論

孫元化一首

元化字初陽蘇州嘉定人萬厯壬子舉人從軍
贊畫由兵部司務進職方主事天啓末間住崇
禎初起武選員外郎歷官都御史巡撫登萊吳
橋兵變坐失事論辟有水一方人集

詩話初陽慷慨從軍歷三獨坐當崇禎初召還
有兩頭蛇見里居樂在堂之南軒賦詩而行詩

中自况卒成妖讖其外孫侯開國語余公
遺集凡百卷詩僅存數篇錄之以當志怪

兩頭蛇

吾聞兩頭蛇其怪不可弭昔賢對之泣而我翻獨喜喜
者意云何以我行藏似蜿蜒不留停奔赴孰驅使當南
更之北欲進掣而止首鼠兩端乎猶豫一身爾蛇也兩
而一相牽無窮已混心腹腎腸各口頰脣齒畢生難並
趨終朝不離咫伸屈匪自甘左右何能以豈不各努力
努力徒縈系殺一誠便一一殺一亦死兩存終奈何聽

之造物理

李衷純

七首

衷純字玄白嘉興人萬厯壬子舉人選授如皋

知縣升南工部主事轉兵部員外出知邵武府

終兩淮鹽運使有激楚齋草

黃貞父云玄白詩博通而裁練藻麗

而膽達上湖建安下逮大厯可稱通才李本
寧云玄白為如皋令治聲冠於江北文學政事

四科遂居其二陳益常云玄
白才高學博千言不厭其多

春懷

貌貅十萬下遼陽
經畧專征有侍郎
殺氣正殷箕子國
捷書空奏日南王
蠻天轉餉愁中絕
異域孤軍蹈險亡
何似乘機歌杖杜
壁堅青海制扶桑

登岱

層巒絕巘轉氤氲
倒影凌虛日觀分
方詫河山同帶礪
忽驚噓吸總風雲
珮環神女青霄度
陸博仙人洞府聞
聖主明堂知欲啓
將無重過稷丘君

送陳孟常太史奉使還朝

春風楊柳拂雙旌使者星輶返玉京一詔責躬憂漢主
九天持節識長卿花深禁苑分仙露月落宮城聽曉鶯
還念東南民力盡好從講幄達承明

浦口道中

今年十月氣尚暖江北宛似江南天未彫楊葉黃冉冉
欲吐麥苗青田田老農築場放犢卧少婦壓槽呼客前
長塗風景亦不惡馬蹄且踏寒雲穿

雨後

夜靜空山中鳥鳴知雨歇寂寂啓寒扉林端澹疎月

順昌道中

山如眉黛水如羅谿上人家繡戶多十五小姬催客酒
銀箏彈出伯勞歌

吳伯敷一首

伯敷字同文宣城人萬厯壬子舉人

燕子磯同梅禹金作

江落鮫人窟磯傳燕子名濕雲拋雨散涼月帶潮生白

浪浮虛閣青山挂斷城知君有高調流水若為情

李孫宸一首

孫宸字伯襄香山萬厯癸丑進士改庶吉士授編修歷左中允左庶子少詹事侍讀學士升

禮部右侍郎進尚書有建霞樓集

陳皇士云嘉靖以來作者

並起流派各別登壇樹幟者無慮十數家各執偏見更相訾警要之不能歸於大雅先生以優柔之韻抒穩順之詞
純古淡泊蘊藉深美

龍池社集

未盡登高興重來結伴游江山仍舊識寒意改深秋席
地妨樵徑攀花作酒籌醉忘歸路遠還為夕陽留

曾楚卿一首

楚卿字元贊莆田人萬歷癸丑進士改庶吉士

累官禮部尚書

自茅原至車盤驛

數家烟樹鬱蕭森人語殊方莫辨音雲傍馬頭晴作雨
松橫嶺口晝成陰關城晚色疎寒木古渡秋風亂夕砧

信宿淹留吾有意故園已在白雲深

葉

燦一首

燦字以冲桐城人萬歷癸丑進士改庶吉士授
編修遷南國子司業歷左中允右庶子天啓末
削籍崇禎初起補少詹兼侍讀學士加禮部右
侍郎累遷南禮部尚書追謚文莊有天柱南中
廡下讀書諸集

抱病

別業空山裏孤燈獨夜身交游江上淡風雨病中人宿
鳥翻深竹溪流響亂榛居然成小隱日日白綸巾

李繼貞 二首

繼貞字散尹太倉州人萬厯癸丑進士歷官兵
部右侍郎有萍槎集

五人詠

義士殺人都市中姓名不藏身不匿明知國法熾如爐
況是鉗網當羅吉挺身就吏不辭家無勞伍伯來相逼

此時上官方自功御此五人如東濕夜提鈴晝設棘五
人齒冷笑不必一尉一人抵於法自相匹即令倍償之
二三亦已畢何煩五命酬一賊但取無失大璫心人命
草菅何足恤臨刑駢首受青鋒相顧慷慨無變色嗟乎
五人生為義士死作神不然厲鬼除君側

猛虎行

山深月黑風怒號猛虎磨牙求汝曹子欲夜行何處逃
歸來有吏夜守門追捕如虎憂心焚雞豚鬻盡將兒孫

不忍老年見生別寧拚瘦骨為虎吞同是猛虎此有冠
駟虞見之徒心酸同是猛虎此有翼狡猊見之亦變色
行乎行乎擇害莫若輕倖脫虎吻留餘生

王心一 一首

心一字純甫吳縣人萬厯癸丑進士由行人選
授江西道御史累官刑部左侍郎有歸田園集
上太行

驅車上太行山頑無奇石逶迤有千盤石磴轉偏側磬

如摩空鳥漸與青雲迫俯見蒼崖間春花間紅白山家
愛尺土縱橫界如畫上有千年碑孔父留轍跡摩挲落
日遲返景射石壁祇慮豺虎驕解鞍投荒驛

繆昌期 四首

昌期字當時常熟人萬厯癸丑進士改庶吉士
授檢討厯左諭德死奄禍贈詹事諡文貞

詩話六君子之獄多以攻客魏取禍文貞無言
責而黨奄人者尤惡之蓋以善謀見嫉也文貞
與顧涇陽書云東漢南宋之事某感歎於中者
久矣互相標榜豈士君子之幸哉又與楊大洪

書不肖歸矣便可不復出又與葉臺山云不入
長安門不知世路之險且惡也是亦明哲之見
而終不免
焉命矣夫

賦得夏母篇書文太君障子

有序

夏忠靖母廖夫人忠靖幼孤夫人教之嚴而愛
事姑甚謹姑病執其手語曰吾無以報汝願汝
壽過我子孫事汝如汝事我忠靖拜大司農夫
人年八十晉封太夫人三楊及胡祭酒諸公皆
升堂拜焉

忠靖掌邦計母廖尚皓首別殿賜宴歸高堂介眉壽是
時長陵中羣公並耆舊三楊列館閣胡公為祭酒連鑣
登母堂却行拜階右鏘鏘委佩聲肅肅奉觴走母也徐
唱言雍容三爵後上云主恩深報稱莫相負下云計臣
勞提挈視吾友嗟此良宴會明時信非偶誰與矢德音
乃在一寡婦養姑泣下泉持家敝箕帚尚書信卿才訓
迪自黃口蟲魚箋獨勞鈞軸教已久繇來孤貧兒往往
踐台斗

送門人程灝然

我已離羣久君能歲一來
茶瓜談舊事水石坐新苔
病骨翻然醒愁容頓爾開
且遲松際月莫聽暮潮催

賦得秋聲一雁飛

浙瀝金風動碧林
瑤空獨雁助長吟
聲寒絕塞三千里
影照長安一片砧
秦隴雲橫朝起笛
瀟湘月冷夜聞琴
於今聖世銷烽火
北海應無繫帛音

洪葆原文闕政報滿還朝

錦帆簫鼓出江湄
水凍黃河驛路遲
鄉味久應忘荔子
客情偏自憶蓴絲
閭門柳色非前日
長樂鍾聲似舊時
聞道使君廉載石
江東父老望旌麾

周宗建一首

宗建字季侯吳江人萬厯癸丑進士除武康知縣調仁和擢福建道御史巡按湖廣被逮死奄禍贈太僕卿謚忠毅

詩話魏進忠未更名日忠毅因冰雹即訟言攻之尋又上言乳母不當入宮引王聖趙嬖陸令

萱以為前鑒及德陵遭劉朝行邊又言內臣典
兵有三不可九害以是客魏之黨皆怨公刺骨
曹欽程舊知吳江縣事遂希旨誣公削奪逮捕
考訊九死無屈辭可云百鍊之鋼矣詩亦慨當
慷以

感事

宮禁高皇誥尚存只今秉筆自言尊太阿已授宵人柄

一作彤弓還
待賢人禮

檇杙齊沾聖主恩舊定朝儀增祿秩新開

甲第擬侯門驚心流禍中原遍未許蒼生得叩閭

周順昌

二首

順昌字景文吳縣人萬厯癸丑進士除福州推官徵授吏部主事轉員外郎死瑞禍贈太常寺卿謚忠介有燼餘錄

詩話忠介之逮在天啓丙寅三月校尉至知吳縣事陳文瑞持檄詣公公從容談笑入書齋理圖籍見案有素楮為龍樹菴僧乞書者泚筆揮灑拂袖而出入縣解越三日宣詔聚觀者累萬人巡撫立於左巡按立於右諸生王節等肅而前曰大人有事地方詎不知吏部居鄉立朝者今日人情如此明公獨不為青史計乎曷不據實上聞請外臺勛治撫按股栗不敢諾綬騎手銀鐙擲之地大呼因安在衆怒奮躍而登攀閣折楸歐諸校尉詰曰肯何從出曰魏上公於是

衆共擊持偽旨者時大雨堂下萬屐齊擲綈騎
伏撫按脇下一尉匿梁上驚墮而死是夜撫按
具疏告變捕十三人下於獄論五人大辟五人
者願佩韋韋馬傑楊彥如沈揚周文元文元公輿
丁也佩韋臨刑告知府寇慎曰囚等為周吏部
死死於義非為亂也公既斃於錦衣獄歸葬白
蓮橋南馬家墩崇禎初吳人毀魏忠賢普惠祠
購佩韋等頭顧合尸葬於是曰五人之墓太倉
張溥為作碑記先是御史倪文煥首劾公及敗
晝見五人戎裝帶劍入其室頃史旌旆導公來
庭中石井闌忽飛起轟震而去亦異事也公子
茂蘭字子佩嘗齧指漉血書疏草訟公冤故邀
卹典特優渥子佩高隱不仕鄉人私謚端孝先
生其血書副本尚存於家予曾見之為跋其尾

愁

獨坐雁聲急風高秋氣空家書千里外舊事一尊中北
地兵戈滿南園草木叢朝來看壯髮強半欲成翁

詠梅

春半梅將盡中庭尚一枝玉人何處是惆悵月明時

吳伯與一首

伯與字福生宣城人萬歷癸丑進士除戶部主
事歷員外郎中出為浙江布政司參議遷廣東

按察副使有素雯齋集

李本寧云福生詩簡遠
曠達兼彭澤左司香山

者山之長 董思白云福生騷賦古律體齊梁
之綺靡 蕪燕趙之悲壯 黃貞父云福生曠懷
雄藻高岑韋柳惟所汲取而激越時近樊川
張子環云宛陵若梅文學禹金湯司成嘉賓標
新領異各成一家君大篇短什時效切
磋古體高朗近體適逸不規規於形似
詩話福生素雯集雖無與竟陵
酬和之作似亦降心從之者

宿姑孰

作客休嗟滯浮生合自勞
蘋花一枕對蘆荻片帆高
生計存書史鄉心寄酒槽
夜來寒不禁換却舊綈袍

汪康謠一首

康誥字唐徵休寧人萬厯癸丑進士除諸暨知縣降補順德府教授入為國子監學正遷戶部主事歷員外郎出知漳州府終福建按察副使有菴猗園詩集

東阿道中

高岸深藏谷頽垣曲帶溪草香風過隴土滑雨沾犁
水流終伏荒臺迹已迷前山不可極馬首暮雲低

沈萃楨 一首

萃楨字君聚平湖人萬厯癸丑進士除工部主
事改南兵部歷員外郎中出知蘇州府遷福建
按察副使以參政分守蘇松道坐報吳江知縣
曹欽程貪墨罷尋落職起補湖廣按察副使轉
福建按察使以湖廣右布政使引疾歸

田園詩

不淺鱸魚興君恩許挂冠城陰三畝宅日暮一漁竿風
翻秋飛鵠花泥晚種蘭兀然微醉好高枕傍闌干

方尚恂二首

尚恂字威侯淳安人萬曆癸丑進士除刑部主
事歷員外郎中出知建寧府遷湖廣按察副使
謫真定同知改衛輝有玉磬齋詩集

焦山

危嶼江天峙烟光寫翠微吹波豚下上狎浪鳥翻飛客
與愁猿並僧呼老鶴歸潮痕出深樹片片濕征衣

曹操疑冢

漳水築荒臺臺荒銅雀失不知青蒼瓦後自何陵出

沈鳳超一首

鳳超字可凡鄞縣人萬曆癸丑進士除海陽知縣遷工部主事道卒

自君之出矣

自君之出矣妝奩日掩塵君心如明鏡獨照眼前人

俞琬綸二首

琬綸字君宣長洲人萬曆癸丑進士衢州西安

知縣有自娛集

明朝別

醉子黃金卮一卮一番換明日山上山相思旦復旦

古意

不與子同行願與子同夢隨子夢所之相憐不相送

羅賓王

二首

賓王字季作番禺人萬厯乙卯鄉薦仕為南昌

府同知有散木堂集

詩話李作罷官歸築哭斯堂於里門或怪其誕然方其佐郡欲率師勤王居恒慨好談天下事及陷身犴獄志不少挫詩歌多憤懣之詞亦奇士也

辛巳三月寇陷襄陽弑襄藩逾旬破洛陽福藩死之兩郡居民屠戮不可勝紀

文士侈言兵希取印如斗積誤非一朝寇至如拉朽召募煩中樞司農勞稅歛竭粟養驕兵漸積成敝苟卒爾襄陽城藩封失其守城陷鼓聲死日落大旗走曾聞賜上方三載專征久勉死謝三軍徒為軍國醜嗟彼泄泄

人處堂不思咎悲憂草野人抱膝徒白首

春日送友人入虔州

旅雁歸不盡春風朝又過東郊一以別青草更如何客
舍炊榆火征衣換越羅關河莫回首楊柳暮烟多

崔培元

二首


培元字辰長海鹽人萬厯乙卯舉人官青陽知

縣有橫山草堂集

長安

二首

陳寶開隆祀昆明辨劫灰古來成帝里今日自樓臺國
事紆西顧天威儼北來綢繆關陝地豈獨武臣才
鶉野天文布龍山地軸雄翦桐開國事累葉後賢功車
馬黃塵裏關河紫塞中從來興王地文物兩京同



明詩綜卷六十五

欽定四庫全書

集部

明詩綜卷六十六

七

詳校官中書臣涂日煥

主事銜臣徐以坤覆勘

總校官降調編修

臣

倉聖脉

校對官庶吉士

臣

潘曾起

謄錄監生

臣

楊恪

欽定四庫全書

明詩綜卷六十六

翰林院檢討朱彝尊編

錢士升一首

士升字抑之嘉善人萬歷丙辰賜進士第一累

官太子太保文淵閣大學士

靜志居詩話相君晚達爰立未久旋
遂初衣薦丁亂離故其詩多鬱思

南園即事

世情不到處獨寤寐歌時但有雲山入兼無樵牧知竹
光虛牖白花氣雜林遲不覺斜陽下鄰家起晚炊

劉榮嗣

三首

榮嗣字敬仲曲周人萬厯丙辰進士除戶部主
事調吏部歷郎中累官至工部尚書總督河道
有半舫集

詩話尚書銜命治河時駱馬湖潰運道填淤乃
創挽河之議起宿遷至徐州別鑿新河分黃水
注其中以通漕運計二百餘里費金錢五十萬
邳州上下悉河流故道濬之尺許皆沙掘之為

河經宿沙落河坎復平迨引黃水入波流迅急
衝沙而下往往成淤明年漕艘至駱馬河潰流
適平運丁惟願入泲不願由新河尚書雖躬督
之諭以軍法間有入新河者舟輒膠於是南給
事中曹景參上疏特糾落職提問下獄論辟獄
未解而卒朝野之論以尚書河渠之任本非所
長皆誤信門客之說用違其才為可痛惜其後
駱馬湖復潰潰舟行新河人頗稱便焉至其詩格
卑卑未能遠
與古人方駕

白石莊萬都尉園作

仙圃宜秋色相將戀夕曛松青新濯雨槐古舊侵雲竹
牖池光合山樓石翠分鳳簫遺韻在擬向月中聞

題畫二首

老去登臨怯杖藤，好山不上最高層。
疎松幾樹斜陽裏，閒看巖前掃葉僧。

灌木陰陰溪水斜，溪頭鷗鷺浴晴沙。
春潮退後風生急，魚網船梢挂落花。

彭汝楠一首

汝楠字伯棟，莆田人。萬厯丙辰進士，除會稽知縣，入為禮科給事中，累官兵部左侍郎，贈尚書。

讀黃維章辯疏有感

聞道欖槍未掩芒驚聞龍戰又玄黃
赤眉豈遂移炎漢白馬還宜鑒李唐
君子獨為洵足恥黨人不與亦何妨
聖明自是如天宥黽勉同心定我王

潘曾紘 二首

曾紘字昭度烏程人萬厯丙辰進士歷官僉都
御史巡撫南贛崇禎中提兵入衛卒於軍有芳
孫館遺豪

大柳驛守歲

古驛逢梅發荒邨帶柳斜
雪明難入夜山霽易蒸霞
碧篆消燈暈黃沙拂劍花
男兒應有氣可復負年華

金陵感遇

花發垂垂歸興濃便教歸去若為容
日邊潮合迷前浦
雨後煙開出數峰
楊柳暗彫江岸笛松楸靜落寺樓鐘
閭閻三月音書斷夢入燕關第幾重

申紹芳一首

紹芳字維烈長洲人萬厯丙辰進士初任應天府學教授遷南京國子助教升禮部主事歷郎中調吏部出為山東按察副使累官戶部右侍郎

送張玉笥中丞進擢總河

玄圭初錫自宸衷四載勤勞特借公開府夙推真使相
導河新命少司空舳艫風引桃花浪海甸雲興瓠子宮
何獨甘棠思召伯轉輸專倚鄼侯功

方大任 一首

大任字玉成一字逢吉桐城人萬厯丙辰進士
除元城知縣擢廣西道御史天啓末魏瑞營生
壙僭侈踰制特疏糾之削籍崇禎初補官升僉
都御史巡山海關尋以副都御史撫順天有霞
起樓詩草

詠懷

束髮慕奇癖讀書萬卷餘游思緬邈場削跡焚華塗舉

世爭捷徑欣然笑其愚稟氣固已然改轍將馬如孔生
恥溝壑原子安桑樞素志亮有託斯人豈盡迂掩耳謝
時賢一心抱區區

張瑋 一首

瑋字韋玉武進人萬厯己未進士除戶部主事
歷兵部郎中出為廣東僉事仕至都察院協理
院事左副都御史卒謚清惠有如此齋集

默思仲先約過簷所茶山園以事不偕小詩代訊

一徑寒雲似練開
茶煙起處小車來
獨憐久病閒雙屐
不踏孤山十畝苔

萬爆一首

爆字闇夫新建人萬歷丙辰進士除刑部主事
調工部歷屯田郎中首劾魏忠賢廷杖流血死
贈太常少卿追謚忠貞

詩話天啓中忤魏璫慘死者先後一十七人萬
公首受其禍公初任營繕主事轉屯田郎郎先管
寶源局而陵工其職掌也因內官監廢銅不發
疏言其姦謂忠賢珠玉盈筭金銀滿屋何欲不

遂顧此廢爛銅器無足入其目而必一手握定者其設心以為不若是無以操天下之利權既操天下之利權不難攬天下之政權臣有以窺其微矣疏入矯旨於午門杖一百奄人數十輩蠡擁牽衣捽髮而前杖後伏小璫於闕下撻擊雖刺踰四日而殞李忠毅上言曰燂死矣未報國恩先填溝壑六尺之孤繞膝八旬之母倚閭旅櫬無歸游魂戀闕臣僚飲泣道路咨嗟然共知非出於陛下之心也臣不暇為燂寃為陛下寃損好生之德負殺諫臣之名豈所以作忠勸士哉夫人臣緘口以待違厚利也危言以招戮實禍也身死而天下悲其忠虛名也舍保身家榮妻子之計博此虛名饑不可食寒不可衣將焉用之況乎傷殘父母之遺體以從龍比於九京人非僕隸法非訊囚罪至死刑命非草芥廷杖之舉殊失士心直俟公論明而卹死錄孤嗟

何及矣被旨以瀆擾詰責蓋自公死忠賢知外
廷之無奈彼何由是鉤黨之獄興而縉紳之禍
烈矣

登黃鶴樓

我欲乘黃鶴飄然物外遊檻前懷古淚且為欄衡收

魏大中 二首

大中字孔時嘉善人萬厯丙辰進士授行人歷
官吏科都給事中死奄禍贈太嘗寺卿謚忠節
有藏密齋集

詩話忠節骨鯁之臣然頗留心風雅里人王屋
布衣能詩公見其賦秋蘭作為之擊節值文會
公曰孰為賦秋蘭者起而復揖之布衣感公
之知公被逮日徒步送之境外揮淚而別

良鄉縣

彰義門西路桑乾古渡分長羈乘傳馬不斷出關軍沙
白迷荒戍城黃壓暮雲車牛徵到骨募派底紛紛

息游

一夜秋聲萬木寒乾坤何處足彈冠時名盡向黃金起
世事都堪白眼看已自故人嗟落魄更誰同病問加餐

風塵伏枕衡門穩行路於今轉覺難

陳熙昌一首

熙昌字逢時南海人萬厯丙辰進士除平湖知

縣擢吏科給事中

東湖雜詩

乍浦瀛壖曲遙連蘆瀝場迎船桑葉白繫纜菜花黃塔
影開初地鐘聲落上方孤城非鐵甕先事慎隄防

詩話乍浦孤城如彈丸倭寇入犯之衝經國者
不置重兵於其地綢繆牖戶之謂何陳公作宰

在太平之日先有隱憂矣予嘗過其地登湯山
山舊有塔寺僧持疏募重建予亟語縣令已之
蓋洋船望見塔易指點入
口之路不可不深慮也

李泰禎 一首

泰禎字道子海鹽人萬厯丙辰進士除龍巖知
縣調漳浦選授福建道御史巡按雲南有遠人

樓詩集

睡鴨

綠萍埽罷柳梢齊疎雨斜陽思轉迷此際池塘眠正穩

風花吹夢過橋西

曹守勲一首

守勲字熙載新蔡人萬歷丙辰進士知曹縣考授浙江道御史出為陝西按察僉事歷陝西副使

題韓淮陰釣臺

城陰片石俯淮流
想象王孫此釣遊
若問將臺何處所
未央宮殿總荒丘

李應昇一首

應昇字仲達江陰人萬厯丙辰進士除南康推官擢福建道御史死庵禍贈太僕寺卿謚忠毅

有落落齋集

詩話王紹徽撰東林點將錄阮大鍼名亦與焉大鍼初與李忠毅魏忠節相善及忠節補吏垣大鍼疑忠節有意逐之遂結傳樞黨於魏監忠毅猶憶舊交貽之書云昔正叔子瞻一生樹敵到底同鎬黨籍之名若使蔡確之徒欲分收一人以去二君子必不願也可和可爭必不受小人之攀援斯君子之品乃見而大鍼既授瑞幕者已絕於諸君子矣及忠毅被逮於檻車賦詩

云細數知交在逍遙各一方魏齊方睥睨阮籍
亦猖狂形影悲相予音書夢已荒古人不可作
搔首問蒼蒼抑何其忠厚之深也魏齊指常熟
魏沈初阮籍則指大鍼其後居南京諸生顧杲
等一百四十人草檄討之既而附馬士英得志
導之重翻三案誅鉏正人僉士之反覆真同鬼
蜮雖有詠懷堂詩
吾不屑錄之也已

哭李弟

憶爾迎還懼悲歌分外深
逐臣生死日歸老弟兄心
慷慨聲發飛揚酒力任呼
盧狂竟夕清夢到而今

黃尊素一首

尊素字真長餘姚人萬厯丙辰進士除寧國推官擢山東道御史削籍被逮死詔獄贈太僕寺

卿追謚忠端有集

楊維斗云先生慷慨孤直詩篇激而不傷

詩話忠端以考選入都時門戶紛爭多以挺擊紅丸移宮三案占人向背客問公以三案如何決擇公曰光宗棄羣臣久今上御極亦非一日三案皆往事恐朝廷所急不在此客無以難也又曰上未登極之先移宮為是御極之後安選侍為是二者祇爭先後不分是非斯皆持平之論惟公之立朝不亢不阿專事補救令楊魏二公從之禍豈若是其酷乎崇禎初死奄禍諸臣止謚及高楊魏周四公論者多咎姚文毅之過刻公與萬左萊顧繆李及三周公久而易名謚

法守禮執義曰端君子以為宜文文肅作神道碑銘云於惟黃公憂來無方惕號同志戒其用

剛益得

其實也

春日早行

抗旌經古道暝色未全分
漸隱林間月微生海際雲
輕陰開積翠細草落青芬
誰破曛曛曉鳴禽客底聞

黃承昊

四首

承昊字履素秀水人萬厯丙辰進士除大理寺評事選吏科給事中歷刑戶工三科左右給事

出為河南按察副使加參政轉福建按察使有

閣齋吟豪

陳仲醇云閣齋詩高華而不傷氣幽微而不損神流便而不降格

李君

實云閣齋風華婉麗詩品在開元大厯間

閒居夜雨

二首

夜半瀟瀟竹輕寒枕上侵明朝無別事風雨不關心
多少閒花草朝朝抱甕忙園丁今夜睡晏起亦何妨
過長溝見蜀山湖荷花沿堤二十里有作

雲山渺渺水悠悠香滿長堤物外秋只少若邪溪上女

乘潮一弄采蓮舟

塞上曲

鄉月多情伴我來沙場相對不勝哀
明朝生死知何處
且解征袍醉一回

袁中道 五首

中道字小修公安人萬厯丙辰進士授徽州府
教授遷國子博士升南京禮部主事歷郎中有
珂雪齋集

詩話小修才遜中
郎而過於伯氏

述別為丘長孺

哀哀一孤鴻飛急向東邁傷哉金石交三載乃相會相
會能幾何一見不復雙子尚滯西陵我遂往鑾江鑾江
不忍別復有攝山行攝山不忍別逐子至冶城冶城不
忍別十日淹江頭飲子清冷酒卧子木蘭舟酸心一夜
風舉目三千路別矣可奈何含淚入城去

郢中送春曲

總以堂堂去何容
緩緩歸隔溪鶯
對語掠水燕雙飛
野草香沾屐修篁
翠濕衣山花一樹
好游女摘來稀

九日登中郎沙市宅上三層樓

滿眼傷心處誰能上此樓
林煙迷蜀道帆影識吳舟
硯北人何在江南草又秋
茱萸空到手欲插淚先流

七夕同彭長卿中郎

清談閒送可憐宵
竹戶斜通宛轉橋
白水青林秋澹澹
好風涼月夜蕭蕭
貧來野客傷時序
老去詩人怨寂寥

驚鳥不鳴更漏靜如聞銀浦弄輕潮

投贈太保蹇令公

三朝元老帝長城
胸貯雄邊百萬兵
太尉領軍陪漢相
上公分陝護周京
卿雲不散投戈色
夜雨猶聞洗甲聲
白袷青編無一事
蕭然還是舊書生

彭汝諧二首

汝諧字原樂吳縣人萬厯丙辰進士有蔚菴逸

草

游桃源澗

碧澗山隈轉鳴泉樹杪懸桑麻緣屋宇雞犬隔人煙客
避中峰雨僧安一宿禪桃花今又放相問世何年

從鄧尉山中還至虎山橋坐月

平林漠漠烟光齊花氣霏霏醉欲迷欸乃湖中小舟小
蒼黃日下西山西寒鴉飛盡渚涯闊白苧歌殘月影低
露冷霑衣萬籟靜伊啞邛落催晨雞

沈德符八首

德符字虎臣一字景倩秀水人萬厯戊午舉人

有清權堂集

陸叔度云先生詩發端必密疊韻不匱不踐王李之迹亦不操王李

之戈前無津筏之求後無瑕玷之慮蓋風人之流與朱雲子云尤臣大家然有流宕之句詩

雖不必拘拘漢魏盛唐而醒藉之與淺俗渾雅之與捕鄙不可不辨也

詩話孝廉生稟異質日讀一寸書所撰萬厯野獲編事有左證論無偏黨明代野史未有過焉者其詩寧取公安竟陵欲盡反歷下瑯琊之樊故多豔字側辭雪颯星碎未免病於才多也

秋暮咏懷

百歲電泡爾疇不慕長年究意命制之修短非我權玉

局出從地玉棺墮自天大丹紫汞鍊神鼎白石煎尅日
飛舉人不久歸重泉信哉服食誤以藥求神仙

人日

挑菜傳人日山邨樸未知雪深添酒券風橫緩燈期歲
事因貧略春光遇閨遲梅園縱深閑宜賞寂寥時

送李元白都運之揚州

度支聖世借前籌誰似江淮地望優宰相杜悰充轉運
司徒王導領揚州軍需西北勞臣勩民力東南國士憂

餽饋古來功第一進賢何待鄂千秋

苦雨

物候違朝爽山容失夕佳陽烏三舍避黑蜥百靈差故
恣商羊橫先收魃鬼埋屋頽無可漏牆壞不須排廢治
平多日新堤潰少厓衢高猶嚙屐巷溢或通簿暫步擔
筴遍徒行沒骭皆居如潛島嶼出似泛河淮耳欲生禾
穎塵難屑麥蘗浸畦浮菜甲墮坎沒松釵是埵俱鳴鶴
無垌不產蛙飲泉偏沃蚓升壁但資蝸穴牖呼鄰酒乘

橈覓市鮭炊艱憎浙米薪濕喜枯茲圖史濡難展屏奩
潤易措迂行甘躑躅愁坐廢詆排護築宵加版存扉畫
瑾柴其魚興浩歎乃粒軫孤懷議禮應雩禱祈晴儻祀
柴何時扇障日利屣上長街

邗城新曲

明月可憐宵曾聽教玉簫佳名二十四第一擣衣橋

天啓宮詞 一首

二廣雙甄陣脚牢御營日麗戰雲高封章臺瑣俱休進

萬乘臨戎正內操

自注唐以左右神策軍為二廣

歲除舊例幸椒房中尉今宵別上觴角觝巨呈宮漏短
便陳庭燎御明堂

顧錫疇一首

錫疇字九疇崑山人萬厯己未進士改庶吉士
授檢討天啓中削籍崇禎初以原官起用屢遷
至禮部左侍郎升尚書有握日草

詩話建文四年事蹟革除之後文獻俱不足徵
相傳長陵用王景議葬以天子之禮然鍾山之

麓一坏安在祀典無聞則其說妄也其曰葬之
西山既不封不樹矣安得又表曰天下大師之
塔要其說更妄也自弘治中禮部主事楊循吉
首請追謚建文君隆慶初東莞布衣譚清海請
復革除年號告之高廟而追上建文君謚萬厯
中通政使沈子木國子司業王祖嫡禮部尚書
范謙給事中楊天民御史牛應元先後進言得
旨存其年號崇禎中繼以給事中張國維禮部
侍郎呂維祺給事中沈胤培駙馬都尉鞏永固
而褒卹之典久而未舉迨顧公典禮容臺始定
議建文君謚曰嗣天章道誠懿淵恭親文揚武
克仁篤孝讓皇帝廟號惠宗馬后曰孝愍溫仁
貞哲睿肅莊烈襄天弼聖讓皇后尋追贈死節
諸臣子謚贈太師者文學博士方孝儒魏國公
徐輝祖贈太保者兵部尚書鐵鉉禮部尚書陳
迪刑部尚書暴昭御史大夫練子寧贈太子太

保者禮部侍中黃觀戶部侍郎卓敬副都御史
茅大方贈刑部尚書者大理少卿胡閏贈詹事
者衡府紀善周是修贈禮部侍郎者翰林修撰
王叔英贈副都御史者浙江按察使王良贈太
常卿者刑科給事中黃鉞贈太僕卿者御史高
翔曾鳳韶贈蘇州知府姚善贈太僕少卿者知沛
縣事顏伯瑋贈大理少卿者谷府長史劉璟贈
翰林待詔者金川門卒龔翊及伯瑋子有為贈
禮部員外郎者濟陽儒學教諭王省贈平陽伯
者都指揮瞿能贈含山伯者都指揮朱鑑贈指
揮使者燕山衛卒儲福謚文正者方孝儒謚文
貞者黃觀謚文忠者王叔英謚忠襄者鐵鉉謚
忠烈者陳迪胡閏景清謚忠貞者練子寧卓敬
徐輝祖謚忠毅者曾鳳韶王良謚忠獻者黃鉞
謚忠惠者姚善顏伯瑋謚忠愍者茅大方高翔
謚忠義者儲福謚貞毅者周是修謚貞烈者王

有謚剛烈者暴昭謚剛節者劉璟謚襄烈者瞿
能謚壯烈者朱鑑謚安節者龔翊謚孝節者顏
有為以上公論交乎此外得謚者又五十二人
曰節愍齊泰黃子澄張曷盧原質葉福也曰介
愍胡子昭也曰忠愍俞逢辰也曰直愍宋徵也
曰肅愍周璿也曰貞愍鄒瑾譚翼石撰陳思賢
也曰穆愍陳彥回林嘉猷也曰襄愍王度也曰
果愍邊昇萬誠也曰翼愍金有聲也曰莊愍樊
士信張彥方也曰忠莊王彬也曰惠莊向朴也
曰貞莊鄭華也曰毅節林英也曰莊節周季瑜
也曰惠節鄭恕也曰義節唐子清也曰忠節陳
性善也曰忠介程本立也曰莊介韓永也曰忠
毅高巍也曰清毅郭任也曰毅直戴彝魏冕巨
敬也曰端直程通也曰貞直杜奇也曰忠貞侯
奉也曰貞勤謝昇也曰貞確徐子權也曰貞達
盧迴也曰貞穆林右也曰貞定甘霖丁志方也

曰剛烈連極也曰端果龔泰也曰莊景陳繼之
也曰果義黃謙也曰文忠陳忠也其中不無濫
及蓋不能不惑於野史之紀述然如梁田玉史
仲彬輩不與則不可謂顧公無卓識也首陳其
說者萬公元吉惟是吾鄉高太常遜志邨典闕
焉後之君子覈其實而損益之可矣顧公致仕
歸晚入閩道出温州為悍帥
所殺詩罕流傳錄其一絕句

西湖

臨安宋故都荷花仍十里際曉湖光平鷓鴣鳴不已

侯恪二首

恪字若樸商丘人萬厯丙辰中會試已未殿試

進士出身改庶吉士授檢討削籍崇禎初起右
中允歷諭德庶子出為南國子祭酒有遂園詩
集

詩話侯公以史官秉南董之筆為逆奄所惡晚
又忤烏程移留都洵古之遺直也詩以大雅自
命嘗言詩自三百篇後存亡者三漢魏存矣六
朝亡也唐存矣五代宋元亡也國朝正嘉存矣
今又亡也其持論深惡新體伸北地信陽
而抑嘉靖七子尤痛詆公安竟陵流派云

感時和張叔載

傷心日日賦登樓聽爾哀歌續四愁欲向風塵歸故里

不堪戎馬暗神州金錢歲入渾難計鎖鑰朝傳尚有求
辛苦先朝張相國于今零落楚江秋

送陳集生使南海

鳳闕春深柳乍齊王孫臺畔草萋萋看君絳節天南去
驛路晴花送馬蹄

丁乾學一首

乾學字天行宛平人萬厯己未進士改庶吉士
除檢討天啓中落職有擁膝齋集

送劉太史使朝鮮

漢殿遙齋詔一函香爐特許換朝衫
天邊築館迎龍節海上吹鏡遁鸞帆
問俗朱蒙時已改探竒賜谷日應銜
歸來擬得殊方志天外河流海外巖

陳萬言

四首

萬言字居一秀水人萬厯己未進士改庶吉士

有鉗園集

出門

出門澹無營閒步郭北隅四野一何曠仰見秋雲徂微
風動蕭林殘暉息遠墟忽然霞氣新散綺照輕裾高歌
以忘憂薄言返故廬

苦雨

四月靈靈降五月不可遏祝融正司方雨師乃攘奪晴
雲乍卷舒倏忽變陰靄飛瀑寫層簷散絲起跳沫殷殷
雷轟車爍爍電排闥欹枕不成寐但聞鄰語聒晨起問
農事何以曳屨輻呼童渡郊西為我鼓雙舩推蓬瞰四

野洪水勢方割蛟龍成一氣桑海莽空濶田平疇盡淪
槽巢倚木末門吏追逋錢入室尚呼喝枵腹不能對相
向蹙眉頰此意隔九閭圖繪難具達安得沉石屏永使
洪濤闊

逢萌祠

炎精熄中葉閔位爭美新黃龍德有悔賢哲甘沉淪感
茲三綱絕大義疇能伸鴻飛貴先時冥冥謝弋人解冠
挂東都盡室逐海濱同時景明哲亦有梅子真寧為吳

門卒恥作禿髮臣二子不可作誰其嗣清塵

長夏憩澹止園

辭家謝塵慮結意在巖壑登高畏炎蒸園林寄幽託澄
湖遙遙岑仁智均所樂入徑參茂松環洲雜芳若灌木
挺喬榦疎篁解新籜中有百尺樓凭虛蔭寥廓青山四
壁垂雲氣屢迴薄朝汲葛翁水夕放支公鶴披襟步湖
湄飄風散花萼逃暑蕩蘭棹迎涼啓羅箔清宵寥無人
倚石縱礧礴歸偃北牕隅三五映籬落覽化得沉冥感

遇任離索物理本如此俯仰亦何忤

吳麟瑞二首

麟瑞字思王海鹽人萬厯己未進士除常州推
官徵授南京禮部主事轉吏部進郎中升湖廣
參政歷江西副使按察使右布政使以僉都御
史撫偏沅有哀鴻秋蟀諸集

除夕

歲盡愁無盡殘鐘客思微一官滄海遠萬里白登圍越

鳥栖初定燕雲信轉稀枕戈空待曉無術報宵衣

長安春興

塵封官柳眼猶迷黃鳥吞聲不肯啼二月羽書淹塞草
十年馬足負香泥長纓有策終難請短札多愁未易題
忽憶孤山此時節亂堆雪片斷橋西

玄默一首

默字會一靜海人萬厯己未進士除懷慶推官
擢吏科給事中歷戶科都給事升太常少卿以

都御史巡撫河南

泥溝驛

寒雲漠漠月初彎
邨舍無人戶早關
十二樓中愁積雪
不知人在賀蘭山

李吳滋一首

吳滋字如穀吳縣人萬厯己未進士知崇安德
清龍溪三縣遷南刑部主事歷郎中出知寶慶
武昌二府升湖廣按察副使有鳳棲閣詩集

送曹安祖假歸

陶然共事白雲司幾度追隨笑語時年齒偶成一日長
禪心同對十門師每分陽羨驚雷筴迭和青谿踏雪詩
君去冷曹方是冷閒居賦就寄無遲

高道素

九首

道素初名斗光字明水一字如晦更字玄期嘉
興人萬厯己未進士除工部主事歷郎中以督
造桂府殿傾論死有景玄堂詩集

陳元孝云屯
田詩俊逸朗

徹顧茂倫云先
生五律清真畚雅

詩話水部才思兼人不以格律自拘古今詩皆
趨詣五律尤為長城當桂藩分建奉命將作南
方卑濕薄樞甫新大瑞丑事丹堊水部力爭不
得既而雷震柱傾吏議周內遂罹顯戮聞者冤
之

兗州道中寄內

黃沙蔽天氣白日無晶光寒雲何蕭條四野青茫茫驚
飈激車輪我馬亦玄黃憶昔出門去臨別重傍徨九月
無裳衣五月無糗糧酸辛各自愛努力願相望悠悠二

千里安得到汝旁中宵不能寐輾轉心憂傷

臨淮秋夜

鳴橈伐鼓漾回波美酒十鍾開櫂歌秦箏甫停越謳發
落日微風雙翠蛾芳年易盡瑤華晚白日朱顏愁不返
橫笛他鄉未忍聞空齋獨坐成長歎

秋日寄沈無回

涼風起庭際簾幕迴秋陰一葉空階落孤燈獨坐深
芙蓉思遠道蟋蟀動愁吟誰念閒居客能傷遲暮心

鍾廣漢云

似高
子業

雪夜渡鎮江

江水寒猶激，方舟夜未央。
驚濤沉鐵甕，急雪下丹陽。
獨

坐親孤燭，商歌送羽觴。
白門遙可望，葭菼鬱蒼蒼。

鍾廣漢云

似徐
昌穀

過清流關

設險何年事，登臨四望賒。
天門閒虎豹，地軸轉龍蛇。
王

氣松榆社，風煙博浪沙。
棄繻關下客，懷古一長嗟。

鍾廣漢云

似蔣
子雲

阻雨彭城驛寄懷李九疑禮部

乍失河陰樹難分淮泗山寒煙原上白秋葉雨中斑鄉

夢深宵斷琴聲永日閒遙憐和歌客相憶渺江關

鍾廣
漢云

似邊
庭實

湘江旅懷

北渚初涼夕蕭條兩岸風煙波連漢口雲樹出湘中碧

草王孫路黃陵帝子宮此時愁欲絕不待暮潮東

鍾廣
漢云

似何
仲默

衡嶽半山亭遠望

五嶺宗南嶽羣峰冠祝融路從山半合亭對海門空
嶠嶠碑蝕瀟湘極浦通冷風如可御吾欲問鴻濛

鍾廣漢云

似王
稚欽

題真空寺壁

真空寺後雙松樹曾見先皇駐蹕初三讓豈宜臨便殿
百年猶共識遺墟離筵慣聽悲歌續佛火偏存浩劫餘

高坐道人無恙在願聞第一義何如

馬任遠一首

任遠字毅仲永年人萬厯己未進士除知葉縣
歷官戶部員外郎

抵蘇州

酒醒夢斷旅帆孤遠岸晴波戲浴鳬橋過橫塘聞犬吠
綠楊影裏是姑蘇

徐伯徵一首

伯徵字孺臺海寧人萬厯已未進士除南陽推官尋改教授升工部主事歷郎中出知揚州府有資敬堂詩集

孤山

為訪幽人跡乘茲暇日遊墓門無塑鶴山寺失安榴徑
愛煙霞夕屏開水墨秋要知白太傅到此也勾留

葉憲祖一首

憲祖字美度餘姚人萬厯已未進士除新會知

縣考選左遷大理評事轉工部主事坐建魏瑯
祠不肯督工削籍崇禎初起南京刑部郎中出
為湖廣按察副使歷官廣西按察使

江行

杳靄中流二水分人傳此地弔湘君南天漸隱巴陵樹
西塞猶飛夢澤雲傍晚魚龍常涌沫隔江鳬雁自呼羣
年來已覺風波慣枕上漁榔處處聞

陸懷玉

一首

懷玉字石含平湖人萬厯己未進士授工部主事歷員外郎中出知鎮江府遷湖廣按察副使轉參政山東按察使福建右布政使

也園

種藥雲根已十年小園獨寤思悠然豈無幽徑通韋曲
亦有連山象輞川半砌苔衣清似水一池花石小于錢
歸來便是西疇長晚稻秋香滿社田

明詩綜卷六十六